



## Schwyzer(kääs) - Dailet

D Kääs-Dailete im Schwyzerland  
sin in den Alpe guet bekannt.  
Im Herbscht bikunnt e jeede Buur  
vom Senn sy Milch als Kääs retour.  
Jetz aber sait e gwise Maa  
in sälem Land z Nordafrika  
d Schwyz syg kaputt und nimme z haile,  
me miess si wien e Kääs uffdaile.  
Und s wätteret no dä Glatt Affi:  
“E soon e Schwyz-Verdailig schaff y,  
ich bring das in dr Uno yy,  
und d Wält wird mir denn dankbar sy“!  
Sy Schnuure het e riisigs Määss,  
und uuse losst er sälber Kääs!

Doch frooge mir uns ainewäg,  
wie wäre mir als Schwyzer zwäg,  
wenn unser Land jetz aifach hitte  
wie Kääs wurd abenander gschnitte,  
zue drey Regione abezwängt,  
an d Noochberländer aaneghängt?

S Tessin wurd zue Italie gheere:  
Das dät ys jetz nit bsunders steere,  
mir hänn Italie gärn, was klar isch,  
und schetzes bsunders kulinarisch.  
Nur hätte mir s halt lieber ohni  
dä gspässig Macho Berlusconi,  
uff syni Tricks und Maitligschichte  
kasch jedefalls rächt guet verzichte.

Sott d Weschtschwyz denn franzeesisch sy,  
regiert vom Niggi Sarkozy,  
wo d Frindschaft mit de Dytsche wott,  
bringt uns das au nit uus em Trott.  
Denn d Dytschschwyz soll jo, wie mir heere,  
bald ganz zum Schwobeländli gheere.  
Und isch die Frindschaft denn e diggi  
vom Angie Merkel und em Niggi,  
denn spiilte mir villicht grad gschwind  
bi däne baide no s lieb Kind!  
Sy wäre nämlig noo so froh,  
denn s Bankghaimnis wär nimme doo!

Mir z Basel hätte au dr Gnuss,  
und wäre uus em Schnyder duss.  
Dr Händel mit em Baselbiet  
samt Schönebuech-bis-Ammel-Lied  
wurd pletzlich jetz fir alli Zyte  
in Stadt und Land nyt me bedyete,  
und s kennt in Zämmenarbetsfrooge  
uns Lieschtel iberhaupt nimm blooge.  
Au wär nadyrlig dä Kanton  
Nordweschtschwyz numme no e Flohn!

Berlin kämt jetz d Probleem go lööse,  
im Rothuus kennt me wyter dööse.  
Und d Baseldytsch-Initiative  
bikämt e Gnaggs, e ganz massive,  
mir miesste nämlig präbele  
und lehre richtig schwöbele!  
Au d Bundesreet hänn ihri Rueh,  
die wundre sich und luege zue,  
wie dä Glatt Affi jetz kaa lache  
und mit em Merzli Cou(s)cous mache!

Sy Schnuure het e riisigs Määss  
und was er uuse losst, isch Kääs!  
Das Dailet-Gwäsch isch schlicht und kurz  
vo ihm aifach e dumme Furz,  
und uns jetz, wie me mergge duet,  
grad au no fir e Sujet guet!

---

D Ladäärne-Uusstellig uff em Minschterplatz und d Waage-  
und Reggwisyte – Uustellig bi dr Kasäärne sin vom Määntig  
znacht bis am Mittwuch demoorge! Deert und an de 3  
Verkaufsständ (CINS) in dr Stadt ka me au alli Zeedel und  
Schnitzelbängg, d` Blaggede und dr Rädäbängg kaufe.

---

Druggerey Runser Druck & Satz AG. Basel